

國朝畿輔詩傳

國朝畿輔詩傳卷六

長洲陶 樸 梟薊輯 任邱邊浴禮袖石校

梁清標

清標字玉立號蕉林一號蒼巖正定人明進士

國朝歷官保和殿大學士祀鄉賢有蕉林詩

集十八卷

四庫全書提要蕉林詩集梁清標撰清標所著詩藁各以古近體爲分不列卷次其詩作於明季者多感慨諷刺之言及入本

朝以後則澗澗乎春容之音矣

畿輔通志清標遷禮部侍郎賑保陽諸州縣殫心察覈人沾實惠有武林斥生誣首逆案清標詆得其情保全無辜甚衆奉命移尙可喜家屬兵衆洶湧民多驚悸思竄匿清標鎮靜

以安人心

得無變

魏裔介序玉立詩枕藉六經沈酣諸史應制記事陳大雅德音之辭咏物懷人備風人香草之義蓋燕許大手而非元輕白俗

郊寒島瘦之所得而企及者

申涵光序蕉林集鏘鏘控不故爲愁苦老病之習體物遂情一唱三歎讀之者如披春風如觀宮闕如覩威鳳在霄不得以一家名而皆掇其所長棄其所短讀是集亦可以得其槩矣汪懋麟序先生之詩本於學問出以和平雍容渾浩博通於諸大家而不得執一以名詩有之穆如清風其風肆

好先生之謂與

方象瑛序先生體國經野外時時賦詩以見志今讀其詩掌邦禮以前莊以肅者其頌之遺乎歸田諸什氣靜而思深殆得于雅乎兵農禮樂之大謫勞登眺之章淵厚廣博者十五國風之正聲乎卽以追美風人之志夫奚媿焉

紅豆樹館詩話蒼巖相國雍容閒雅宏獎風流
一時如張敦復汪蛟門繆歌起方渭仁諸公皆
游其門先生自公退食日抱芸編黃閣青燈互
相酬唱前輩高風可想像于辰告許謨之外詩
麗而有則莊而不佻可稱臺閣中鉅手倚聲
尤工所作棠村詞當與梅村香嚴並傳也

發雄州

晨出賓陽門水氣滿巷陌故吏擁道周頭鬚看盡白孤
亭立豐碑上勒先子蹟城郭飽戰烽僅留一片石垂及
五十年表章益烜赫停車數徘徊泫然感今昔父老攜
杖觀相顧聲嘖嘖樽酒煩故人持觴勞歸客簷霑雨廉
纖春泥深徑尺昔遊詎忍忘鄉心苦已迫漠漠嶺上雲
矯矯空中翮河梁草色青振袂風烟隔珍重謝耆舊久

要願無數前路笳鼓鳴回首黯魂魄

初春北上留別兄弟

春風何澹蕩寒日照郡樓舍人治我裝遊子去舊邱東
門設祖帳親戚羅道周顧余麋鹿性林壑夙所求用世
本無具竊祿良足羞胡爲煩徵書勸駕多朋儔一朝辭
墳墓啼猿聲啾啾宦途方險巇置身安可謀津亭傾離
樽清淚沾敝裘帝闕轡羈縻王程敢遲留執手珍重
別前路云阻修回首語昆季爲我治田疇茲行報聖
主歸臥西山頭三徑勿荒蕪烟月長爇猶

秋日

暑退天日晶秋光淨若洗小堂晝垂簾竹樹蔭階砌怪
石立縱橫藥欄發芳芷杜門無雜賓晴暉明窗几散書
恣其蒐悠然契深旨外物何足欣寵辱皆妄耳蕭森儼
空山婆娑忘城市急雨須臾來簷花落如綺守官多愆
尤鴟梁昔所恥安能作蝸牛升高不知止

挽船曲

寧爲官道塵勿爲官道人塵土踐踏有時歇人民力盡
還戕身長安昨日兵符下舳艫千里如雲屯官司催夫
牽纜去扶老攜兒啼滿路村村逃避鷄犬空長河日黑
濤聲怒縶夫追捉動數千行旅裹足無人烟窮搜急比

勢如火那知人夫不用金錢健兒露刃過虓虎鞭箠
叱咤驚風雨得錢放去復重催縣官金盡誰爲主窮民
袒臂身無糧挽船數日猶空腸霜飆烈日任吹炙皮穿
骨折委道傍前船夫多死後船夫又續眼見骨肉離安
能辭楚毒呼天不敢祈生還但願將身葬魚腹可憐河
畔風淒淒中夜燐飛新鬼哭

上灘行

曉起酸風來石竇驚灘急峽江波溜白日陰巖山鬼吟
飛流噴沫魚龍鬪崩崖摩雲勢欲吞蒼烟罅壁苔痕繡
荒城昨夜催灘夫沿村比屋羣吏呼鶉衣百結亦人子

倉皇追捉如逃遁，冥濛天黑帆盡溼。
縣令雨立衝泥途，令言城空居人少。
屯官降卒衆相勦，歲收租稅令不行。
田家半菽何曾飽，供繁役重支拄艱。
簿書期會皆草草，西江貧瘠昔所嗟。
况復豺虎恣攫拏，空巖哀狖啼夜月。
窮鄉密箐盤虺蛇，舟行轉側類毛羽。
峻嶒湧地根槎牙，我來鼓枻三嘆息。
長年爭叫風飄色，民勞驛殫恤未能。
浮家泛宅境轉偏，白首江湖徒爾爲。
坐老孤村計亦得，漁陽老將行。

漁陽重鎮臨邊隅，將軍燕領赤虬鬚。
少小結髮事行陣，鸞弓自請當單于。
軍中行酒青油幕，馬上穿楊金僕姑。

養士家財能立散摧鋒徧體無完膚將軍膽略古無兩
逐北直取封侯賞大小身經數百戰九邊形勢如指掌
報主瀕死沙場中論功欲繪淩烟上豈知歲月空蹉跎
將軍已老雙鬢皤內外一家方罷戰毳帳滿地驅明駝
邊備不修閒士馬歸來小獵南山阿猿臂無力射猛虎
雄心臥看浮雲過寶刀旣賣賓客散柴門反閉張雀羅
幽州健兒夜吹角夢魂猶繞白狼河

王鐵槍

王鐵槍真男兒人留名豹留皮河上血戰志不移梁運
旣去疇能支問破敵曰三日讒毀計已行大功安可必

鬪雞小兒事業成國恩未報遑偷生朝梁暮晉者誰子
紛紛段凝之輩真如蟻嗟乎義士一死重泰山陽山朱
三羣盜耳良禽栖木貴能擇將軍之死亦可惜

霸陵尉

北平守材絕倫生不利逢漢文射石沒羽如有神田間
夜還醉尉嘆今者不得行遑知故將軍結髮七十戰封
侯賞不至迷道豈非天恥對刀筆吏偃蹇徒失貴人意
知與不知盡流涕惜哉大將軍奚論霸陵尉

登觀音巖

先人曾登觀音巖予今曉過停征帆懸厓俯縮臨洞壑

凌空結構何巉巖千尺石幢垂碧乳萬條蘿薛纏青杉
神力何年立鼇極削壁界破蒼天色盤磴斜通蓮炬紅
法雲倒湧琳宮黑蜃窟陰森鬼斧開丹樓窈窕星辰逼
慈悲妙相翠微中芙蓉作龕追琢窮龍抱珠光翻海月
潮隨梵響來天風層巒對峙列几案烏啼猿嘯烟冥濛
振衣仄徑攀援上江山歷歷客愁放晨鐘暮鼓變寒暄
石轉灘迴迷背向我來萬里幽幾探豈謂茲巖吐奇創
昔聞過庭語夢寐四十年山靈尙無恙陟險疑有緣嶺
南倣詭此地偏輕身挾羽如飛仙黃塵萬斛銷欲盡花
雨晴嵐滿畫船

許生洲思硯齋歌

我聞中丞古遺愛守越聲名齊海岱拙毫獨喜傲眉山
已知冥契千秋在精神感召夢寐通郡齋夢見東坡公
一硯手授豈荒忽遲明硯出山巖中硯背有像夢無二
中丞拂拭嗟神異玉德金聲詎偶然龍尾鳳咮爭名字
東坡好硯各有銘況復肖像留儀型歸裝唯有懋林石
兩袖攜得山川靈中原劫火生荆棘六丁收去無消息
中丞騎箕篋衍空孝子慈孫淚沾臆齋名思硯歲月徂
章侯陳生摹爲圖詞人題贊徧海內詎與瓦石同榮枯
古來神物有得失離合他年安可必君不見豐城之劍

分雌雄延津波沸雙龍出

永寧程總戎母康太夫人殉寇難爲賦投崖行

龍蛇起陸天地荒中原擾擾皆戰場洛陽烽火徧州邑
白日晦蝕無三光嵩縣劇賊一何酷程母被執義不辱
慷慨罵賊身投崖經旬不改顏如玉有兒現偉稱人英
求母不得寧徒生興安舊帥壯君貌授兵討賊前驅行
賊渠授首無堅壘灑血祭墓雪讐恥舊帥雅負善相人
君貴他年當鎮此猗與孝烈鍾一門家風伊維今猶存
持節遂爲大都護始知相術非夸言噫嘻世亂弛綱紐
仗節死義嗟希有歐公作史千秋垂斷臂惟傳王氏婦

於今再見康夫人凜凜豈等并黛倫甲申之際四維絕
男兒甘爲全軀臣

梅心驛

寂寥巖下宿宵柝起巖更驛火明還滅繩牀臥復驚劫
寒山鬼泣燭暗虎風生排馬凌晨發烟江是皖城

登小孤山謁天妃祠用壁間李中丞韻

杳靄江天濶孤峰障泖流烟鬟神女祀鐵柱海門秋飛
閣鳴鼙鼓仙轡送客舟山川吳楚會登陟散羈愁

遊湖口鐘山次壁間韻

怪石臨無地凌空疊亂峰江聲晴到閣巖響夜聞鐘禪

定看馴鶴雲根起，蟄龍遙青五老出。憑檻盪塵胸，
列炬探幽處。晨爲洞壑留，捫蘿尋斷碣。倚杖瞰飛流，漫
滅眉山字。蒼茫碧漢遊，莫言彭蠡濶。絕壁小滄洲。

峽江雨中

亂蝶臨厓出，濤痕半未消。檣燈搖霧影，烽火散山椒。
峽東江如線，篷驚雨似潮。酒澆人欲倦，天入可憐宵。

晚晴至吉水

湍急村墟暝，城孤睥睨昏。雨帆朝過峽，霽嶺翠當門。
霧斂江山小，天空虎豹尊。古來文獻邑，凋謝復誰論。

過演陽

滇陽山水邑旆藹海雲橫鳴磬嚴江戍飛花繞客旌雙
巖泉石峽萬壘尉佗城安得窮幽處翩翩躡屩輕
對擁千峰斷中流一水長僧居團竹柵虎氣暗桃榔虛
閣崩雲立飛泉挂幔涼古今沉戰伐何地問蕭梁

將抵南海

紆折程難計聞鉦識水郵綠垣螺蚌甲代絮木棉裘潮
逐崩厓落帆隨曉月流忽驚開嶺桂疑是故鄉秋

雨中束裝

天入輕帆夢心生故國春蠻花繁客舫海雨送歸人影
較征鴻早愁增燧火新瘴鄉身一葉頭白飽風塵

雨中過嶺

飛來曾挂角天半有僧棲蒼鼠穿厓過春禽送客啼嶺
蟠諸峯盡雲壓萬峰低冒雨忘危磴心懸貢水西

九日

歲歲登高處憑闌此復同客情秋色裏世事亂雲中
影連殘照汀沙起斷鴻天南頻極目燧火至今紅

送陳子將門人請急歸同安

萬里衝炎霧扁舟憊老親海天無靜土烽火見歸人
轉徙田廬廢承歡鬢髮新長鯨猶未息子舍莫逡巡

送李天生檢討歸養

揮毫初奏賦愛日早辭榮一疏茅容願千秋李密情商
風高鄴杜戰火息咸京謁者繻曾棄關門吏卒驚

送方涓仁門人請急歸里

索米金閨客平生好著書治裝唯藥裹歸興寄樵漁詩
以窮愁富交因拙宦疎子行須自愛風雨有荒廬
抗手方干別蹉跎滯一官鄉心經雨重秋影入牕寒病
苦參苓累身謀去住難嚴陵灘尙在高卧少風湍

送梁園出守寶慶

幾載含香吏新看五馬雄民生征戰後郡治草萊中班
竹臨湘水蘭臺拂楚風他時裁錦字可有北來鴻

新樂驛亭次壁間韻

萬里驅車道路偏
伏羲臺畔破秋烟
漢廷諭蜀煩司馬
池草生春憶惠連
古驛鄉心叢菊外
并州客夢嶺梅邊
風塵又逐征鴻去
紅樹依依似昔年

金陵道中

東南形勝自江淮
百戰河山稗草埋
結綺歌殘銷玉樹
景陽鐘歇葬金釵
天留蒼莽騷人句
地入欽歔弔古懷
士女如雲聞喚鶴
春郊閒卻踏青鞵

與昭性家兄話別

刻燭聯牀話路歧
吾兄新廢蓼莪詩
難將金錯還官庫

漫負紅顏忤畫師
子舍淚懸雲黯處
山樓目送雁歸時
殘春去住俱多感
別恨無端若柳絲

輓門人沈康臣

珥筆才名高秘省
祥刑雨露徧圓扉
爭傳沈衆工詞賦
何意休文減帶圍
月冷空牀遺稿在
觀歸水驛塞鴻飛
一官未達今黃土
白首風前淚溼衣

渡黃河

滾滾河流古岸長
水神祠廟枕斜陽
來從天上分疆域
曲向中原接混茫
風閃驛燈寒過雁
路沿堤柳夜多霜
吹臺欲問繁華地
鶴首飛帆入大梁

拜張許六王祠

名城喋血共安危道左飛塵賸古祠
六矢當年知號令千秋爲厲見旌旗
江淮力障孤軍日睥睨風生苦戰時
每讀昌黎書傳後傷心南八是男兒

舟過潯陽

潯陽瑟瑟石苔斑今古柴桑歲月閒
蓮社籃輿陶令酒烟扉屐齒謝公山
舟停湓浦衫應溼虎嘯溪橋客獨還
此地江聲分九派何堪矯首憶鄉關

采石磯

千年牛渚草蕭蕭供奉風流自不遙
被酒尙留明月影

然犀誰照暮春潮
菰蘆烟火連三楚
金粉江山過六朝
細雨鳴榔嗟往事
謫仙樓在客難招

旌陽萬壽宮

靜明宮殿鬱岩薨
鐵柱難從一炬銷
波立蛟龍孤劍盡
月臨鐘鼓百靈朝
雲霄絳節餘兵火
今古青山鎖寂寥
沖舉當年仙侶去
不堪重問舊江潮

過東湖

東湖烟水畫冥冥
湖上孤標孺子亭
百戰僅存高蹈地
千秋獨著少微星
灌園翁去空書幣
下榻風流識典型
寂寞經過人不見
章門雨雪一燈青

廬陵小泊

章貢天開白鷺洲山城水市半沈浮
孤懸塔影搖沙舸晴捲江聲入郡樓
舊德門荒祠草暗戰場人老講堂秋
憑闌白首餘雙淚螺子蒼烟縮客愁

儲潭讌集

潭上荒臺堠火紅牙旗獵獵捲簾櫳
香分橘柚清樽裏雨漲笙歌晚嶼中
廢壁沉雲開戰壘橫江層鐵鎖蛟宮
霜青油幕稱雄鎮刁斗聲傳萬壑風

度大庾嶺

巘岼萬仞劃天開曲似離腸日九迴
雲沒危峯盤磴出

翠含春色瘴江來嶺門對擁衙山寺鳥徑斜穿吐驛梅
刊鑿辛勤煩相國千年猶說五丁才

歸舟漫興

牙檣北逐雁鴻羣人去紅亭倚夕曛五岳芒屨生壯色
四山花氣漲春雲蠻方瘴癘和愁散客路風烟度嶺分
十載江湖銷戰伐戈船此日又移軍

過商邱

鬱鬱新槐原上村野農趨市趁朝曦採桑紅女蠶眠箔
催賦青苗吏在門巡遠尙聞遺戰壘鄒枚誰復弔吟魂
兔園依舊薜蘿綠寂寞梁王好客樽

大梁懷古

前驅鼓角戍樓晴萬井烟花古汴城
執轡市中游俠地銜杯臺畔濁河聲
玉津園廢蛙鳴晚艮嶽雲埋草色平
零落憲王新樂府夜深誰炙紫鸞笙

送冀公治大司空歸廣平

洛水尙書振袂行重開三徑向秋清
漫將薄譴論榮辱祇惜仙班去老成
廿載緇塵岐路話一樽涼雨故人情
每憐拙宦稱同調愁聽陽關第二聲

贈張眉仲令安定

儒吏分符動玉珂隴西戰後事如何
邊烽乍寢人牽轡

寒雪初消客渡河
琅瀉蒲桃春釀熟
獵回沙磧暮雲多
政平訟少垂簾日
羌笛頻聞折柳歌

送陳子厚歸海寧曾齊尊公岱清同門遺集數十卷相示

每嗟亡友廿年餘
鳳羽來過抱父書
明月暗投逢白眼
陽春高唱逼黃初
談深更下人琴淚
歲晚言歸風雨廬
今日臨邛誰好客
吾衰負媿薦相如

送陳子文由大梁歸海寧

京洛懷歸有敝貂
臨歧飛雪暗河橋
鄉愁夢入吳天近
客路春將汴酒消
薄祿逡巡原驥足
故人期許自雲霄

君家伯仲非長賤句就池塘慰寂寥

送姜定菴少京兆之官奉天

萬里寒帷捧檄行
葱葱王氣是陪京
雲飛越水親闈在
雪霽盧龍春草生
眉宇紫芝渾似舊
鄉關銅馬喜初平
莫因遠宦添霜鬢
十載封章繫聖情

送龔憲副還秦中

客從北地擁旂綸
把袂欣逢舊酒壚
指畫河山人慷慨
身當戰伐事艱虞
籌邊誰上金城畧
聚米能成玉塞圖
珍重春宵燕市話
中原鎖鑰在西隅

贈王純嘏比部擢江右方伯

畫省才名重漢廷持籌更喜試新硯大藩坐擁章門節
邊計今歸執法星見說飛鴻仍道路能無折柳話丁寧
瘡痍佇待君爲起數載西江戰血腥

春日雪中宣捷口占

三冬歷盡霏春雪六載初聞取岳州自昔兵戎關稼穡
也應天意厭戈矛沅湘險隘逡巡失湖海烽烟次第收
父老不須憂粟貴早聽布穀事西疇

寄高念東少司寇兼爲勸駕

八載垂竿野水隈天邊一紙辟書來秋曹堂饌仍堪飽
舊觀桃花恰再開向子未完婚嫁累鄴侯終是列仙才

燕山春色屠蘇酒遲爾聯牀夜覆杯

送丁雁水職方分臬虔南

賁章雄鎮倚江臯吹角樟陰漢使勞百戰尙餘清獻蹟
千秋重贈呂虔刀鬱孤草長連平楚灘路帆懸起怒濤
知爾才名高粉署登樓嘯詠醉春醪

雨中漫興

雨灑都亭樹色齊泥塗車騎尙棲棲飛鳶道礮連三輔
插羽徵兵下五谿午夢風行桃簟薄草堂雲護畫簾低
可憐閭左疲輪輓猶說南天戰馬嘶

秋日

秋高碣石野雲黃虎旅重閭辦蜀裝萬里懸車危棧月
五更吹角麗譙霜塵飛河隴鳴哀雁日落巴渝冷戰場
決策西南多廟算早令王翦起頻陽

送高念東少司寇歸淄川

司寇心常在五湖乞身今荷主恩殊好從丹竈
尋真訣甘以時名讓壯夫白鷺洲邊機事少青蘿洞口
水雲孤歸裝知爾無多累剩得文家舊雪圖

寒沙漠漠度關河惆悵離樽可奈何歧路交情今夕醉
雪中春色故山多浮雲偶出憑舒卷塞雁孤飛避網羅
聚散如萍君自愛夜行須耐霸陵訶

送張又南大廷尉省覲歸秦中

爲賦將離促去騶寧親西向古涼州平刑舊說張廷尉
家世還推漢列侯幕下論文秦月小軍中握槊玉關秋
風清甲帳喧鐃吹絕塞萊衣亦壯遊

送方渭仁門人典試蜀中

銜 命詞臣下鳳樓西風古驛暑纔收重將文教
銷兵氣倘獲驪珠是壯遊叱馭褒中雲棧曉篝燈劍外
錦城秋莫令揚馬傷淪落自昔才人出益州

送魏環溪大司寇

予告歸蔚州

老臣累疏去從容藥裏書籤次第封十載丹誠留 殿

陞一天風雪度居庸晴牕散帙田間課筇杖看雲塞上峰我欲移家依故里薜蘿深處訪高蹤

過蘆溝

回首清秋入帝城湯湯已作斷腸聲西風又動桑乾水吹老征人髮幾莖

春郊卽事

畫樓高處故侯家誰種青門五色瓜春滿園林人不見東風吹老海棠花

長安早秋

薊門烟樹影層層客病鄉愁望裏增忽覺西山來爽氣

秋風先到漢諸陵

秋日閒居

竹塢無塵短榻幽蕭蕭涼雨下城頭閉門休沐朝來嬾
花落蟬鳴一院秋

雨中同家兄昭性猶子承篤夜話

樹樹香飄葉葉風聯牀共話思無窮家鄉秋老芙蓉墮
人在燕山夜雨中

秋夜

秋雨秋風滿上林小堂秉燭影沈沈長安萬戶寒衣早
多少人家在暮砧

寒食

禁火人家水上村
金鷄珠彈走王孫
曉鶯苦喚思歸夢
開盡山桃未出門

若水弟招飲南郊觀荷

逶迤秋草引坡陀
流水聲中子夜歌
折得碧筒人半醉
菰菱深處暮涼多

重遊南雄郡署

水廊已廢綠蕉稀
積雨苔青上客衣
前度劉郎能識否
一般燕子入簾飛

贛江歸舟

一船簫鼓帶潮回
昨日京華有雁來
不道客心方歷亂
媚人江路野棠開

雨村

數聲鳩婦雨濛濛
竹塢山桃寂寞紅
何事飛花偏惱客
春光半減亂流中

望潛山

皖山天柱鬱嵒巖
江左風流大小喬
霸氣銷沈人不見
碧烟如黛鎖春潮

江浦道中

柳塘春水弄新晴
花草金陵促去程
雙袖染來青嶂色

六朝送盡暮江聲

三月三十日宿州旅中

鶯花三月太怱怱客裏相看驛燭紅
一夕東風留不得萬條飛絮暮烟中

中山道中

綠滿中山雨氣新曉涼暫浣客衣塵
往來最愛垂楊路又聽黃鸝喚遠人

輿中口占

城下驅車傍柳行日高沙路亂啼鶯
不知朝市春多少宣武門邊新水生

村居午夢

野簪千官車馬屯三間茅屋柳當門
紙牕夢醒紅偏好
人在桃花水上村

送羅宏載赴湖南幕

湘江苦竹晝淒淒有客擔簦落日低
王粲禰衡今寂寞
黃陵廟口鷓鴣啼

爲高澹人學士題畫

薜蘿古塢倚雲根結侶漁樵道自尊
一夕秋風蘋末起
疎烟細雨滿江村

題汪蛟門所藏冒姬鴛鴦圖

飛花片片趁香泥
水漲銀塘綺翼齊
何事蘭房圖匹鳥
鹿門自昔愛雙棲

石門驛雨中

千巖漠漠野雲低
二月山村布穀啼
鹽帳春寒人睡醒

一天風雨

孝陵西

孤村

幾椽茅屋槿籬遮
宛轉危橋仄徑斜
村僻不知途近遠
一溪春水放桃花

送陳子厚南歸卽次留別原韻

孤吟越客去還留
知子才如萬斛舟
長鋏攜來人漸老

不堪重上仲宣樓

蕉林書屋

半船坐雨冷蕭蕭仿佛江天弄晚潮人在西牕清似水
最堪聽處是芭蕉

澹烟晴日滿簾櫳春色依依上小紅客爲看花頻載酒
海棠開否問東風

成克鞏

克鞏字子固號青壇大名人明進士國朝歷
官秘書院大學士加少傅兼太子太傅祀鄉賢
有清慎堂集四十四卷

四庫全書提要倫史五十卷成克鞏撰是編以
五倫分五門各有子目君臣爲數四十五父子
爲數二十二夫婦爲數十一兄弟爲數十六朋
友爲數三十三考克鞏休致在康熙三年此書
成於康熙十六年蓋晚歲田居借編
摩以送老採撫燕離固非所計也
歲輔通志克鞏清端恪慎贊襄密勿動中機宜
世祖有太平宰相之褒聖祖登

極優一切典禮文章多出其手以疾乞
歸優游林下三十餘年卒年八十四

大名縣志克鞏大學士基命第三子崇禎十六
年進士本朝定鼎授國史院檢討十年遷吏

部右侍郎轉左侍郎晉尙書旋拜秘書院大學
士時天下初定世祖章皇帝銳於有爲

以克鞏名臣子少參機務練達政體當任學士
時數在前者凡十餘人未幾領戶兵二部兼理

刑部事會計舉典都御史員缺特命克
鞏以內宏文院大學士攝理克鞏感激知無

不言首上修省一疏繼忝舊憲臣徇比匪人請

撤回滿漢巡按之不稱職者又請增設御史定
曹銓置簿之條以核功過嚴督撫考察之例以
愚法廉立劇邑久任之規以課成效嚴誣告反
坐之例以杜刁風皆切中時要悉見施行十五
年改保和殿大學士又明年晉少傅求退十五
溫旨慰留居常或中夜出片紙作圖書密詢
時事克鞏亦入片紙占對雖家人子弟不聞所
言其縝密如此十八年仁皇帝御極三
月主會試克鞏屢持文衡前後所得士如湯斌
張永祺沈荃李來泰馬世俊唐德亮張玉書米
漢雯許三禮嚴我斯皆一時名士多所建豎爲
世名臣而郭士望梁化鳳亦以忠節武功著十
月以母疾請假弗許用原銜兼國史院大學士
康熙元年仍改秘書院大學士
積勞致病連疏乞休遂不復出
紅豆樹館詩話太傅承文穆公之後綸扉偉望
朝野所推舊第有素園在城東南隅爲文穆公
別業太傅歸老後重加葺治其中雲石堂八風
亭攬秀巢雲樓柳塘靜舫諸勝皆極水木清華
之致嘗繪素園圖同時題詠甚多歷數世園漸

荒圯故址幾不可識圖亦無存而故老流傳不啻與綠野平泉並留遺韻則太傅之清德遠矣

浮山小洞詩

浮山小洞俯高樹巖端常有流雲駐初葉繁花送夏春
紫萸黃菊催寒曙昔日清平汗漫遊飛觥坐月客淹留
引滿那辭銀鑿落當歌肯愛錦纏頭十五年前衛上別
黎陽河畔垂楊月旅夢幽尋洞口雲滄沱迢迢不可越

北園

別業歸來卜蔭然松菊存百年誰氏墅前日謝公墩背
郭堂成草依流竹繞門登樓還四望幾處舊時村

修素園

第後園林依水灣城隈雉堞帶烟鬟幽谿鶴步苔痕靜
深樹雲留鳥語閒畫錦重霑新雨露

天章分映

舊湖山花晨月夕優游處手澤書香俯仰聞

杜立德

立德字純一寶坻人明進士 國朝歷官保和

殿大學士諡文端祀鄉賢有太傅詩選一卷

畿輔通志立德選給事中疏請舉經筵定朝
期嚴加派肅禁地彈劾不避權貴累遷刑部尚
書每讞重辟反覆爲求生路得則退有喜色不
得則日中不出署暮歸或竟忘食日入奏退
刑部尚書杜立德也不要一錢亦不忘殺一人
聖祖嘗言閣臣如杜立德真不愧古大
臣後以疾陳請

御製五律詩一章及怡

清洛社圖章

以榮其歸

寶坻縣志立德入相殫心獻納具有體要立朝

十餘年

恩禮優渥嘗

賜宴

立朝

特命列坐

殿內漢大學士入

殿坐自立

德始也初寶坻

以隸通州故分派

船百有二

十甚爲民累以立德力陳得減乞休歸里欲

然若未有權位者遇故舊有加禮人益賢之

王熙杜文端公墓志公慈和謙慎恂恂寡言及

當事決大疑則毅然不可奪居諫垣因事陳奏

裨益尤多歷掌三部練習朝章遇

事援據掌故兼集衆長允當其任

劉正宗序杜子詩時而重嬰鳴則停雲諸什

不足喻其篤摯也時而憂深民事則絲穀諸語

抒懷抱則楊柳梧桐之句不足肖其光霽慕其

冲夷也華而不靡廉而不剛跌宕而不佻激玉

潤珠明規圓矩折杜子之詩其杜子之人乎

紅豆樹館詩話韓文懿公葵丑會卷已遭本

房勒帛總裁杜文端謂無元文搜遺卷獲之拍

案激賞領已批抹咸爲惋惜文端執筆就直處
改千里來龍四字遂定首選寶坻李樸園太守
光庭詩云吾邑少耆宿大老推文端史傳未曾
見軼事間里言公爲前進士家乘無諱謫仰荷
世祖知珥筆翔詞垣開科主浙試
龍飛之三年己未鴻博科玉貢兼珠掄甲辰
迄癸丑兩次典春官丑歲尤鼎盛首選長洲韓
韓卷初未薦幾抱荆璞歎公嫌少傑作鐵網搜
紅珊瑚果得文懿文擊節爭傳觀無奈當頭棒一
痕難洗湔公曰此易耳執筆髯微掀改千里來
龍四字如綫穿遂以冠多士會狀開其先
終爲大作家於師無愧顏云云蓋紀實也

送客遊天池寺

天池在何許千峰入雲霧岷峨見積雪海日中夜曙
風下碧落鐵瓦失堅固羽人昔託蹟璇圖告朝著象鼓
頌紫宸丹樓耀石路君去陟崇標懷古振詞賦長嘯

掛匡君星河近指顧安得凌虛翼相攜策高步

送高念祖還櫛李

晷際同君酌彌深兩世情澤留花縣雨

尊甫寓公使君向令子是有惠

改名藻謝家英客夢江帆近遊懷燕樹清神駒千里壯

試看錦雲程

有所思

故人經歲別悵望久無音塢隱江村小烟迷樹色深疎
風吹綺幕新月上瑤琴靜裏相思極何時愜素襟

秋日答友人

閒中序幾更風過曉涼生霞捲秋山定天高雁語清吳

飲逢縣友玉塵押詩兵俗冗今初洗從容理舊盟

都門秋興步工部韻

錄二首

紅雲疊岫擁蒼林巍濶神京旺氣森山勢橫包燕趙
迴邊隅遙控海天陰北辰魁輔三垣象王會梯航萬國
心衣馬翩翩盈紫陌笙歌明月雜秋砧

高秋俯瞰衆河山遠勝金湯百二間壓地岡陵歸要領
擎天鎖鑰仗雄關壯猷人競封侯骨鐵馬豪開壯士顏
自古勲名都會早聲華翹首望朝班

高爾儼

爾儼字岱興靜海人明進士國朝歷官宏文

院大學士謚文端有古處堂集四卷

四庫全書提要古處堂集四卷高爾瞻撰是集大抵應酬之作亦尙沿明季之餘習王崇簡序公沈涵經史波瀾諸子百家而性情流衍其中觸境而形皆其不得不言者世有識者或以子爲知言

雨後遊浣園觀奕晚棹而歸

驟雨過秋林河漢爲傾倒雨歇碧天空微雲澹縹緲興高不畏溼緩步沙洲道遙望綠成陰物象皆可了深林一徑微輕風亂啼鳥轉曲不見人但聞新蟬繞稍前樹作屏堂上二三老棋聲落清寂蕭散人語杳開樽後院宜薄潤晴偏好鬱蔥帶雨痕殘陽明樹杪交枝覆堂陰

國朝畿輔詩傳

卷六

三

暑氣靜如掃攜酒上琴臺脫幘觀林表俯眺碧流暗孤
帆宿歸早酒酣出林岡樵歌來幽窈晚烟歸棹急明月
落川皎

國朝畿輔詩傳卷六

終

國朝畿輔詩傳卷七

長洲陶

樸堯薌輯

慶雲崔

旭念堂校

王崇簡

崇簡字敬哉宛平人明進士 國朝歷官禮部

尙書謚文貞有青箱堂集六十六卷

四庫全書提要青箱堂文集三十三卷詩集三十三卷王崇簡撰崇簡有冬夜箋記已著錄崇簡練習掌故爲禮官嘗議祀北嶽於渾源州今其疏具在集中然其文類平近流易徐乾學序謂其卮詞調語無非仁義道德殆不免於徵詞詩集以編年爲次始天啟丙寅迄 國朝康熙戊午蓋萊陽朱宛所刪定也

畿輔通志會

詔察明季殉難諸臣崇簡疏列

范景文二十八人請予旌典薦起國史院學士

時子熙亦官宏文院學士

世祖曰父子

同官臣鄰希覩然肩隨齒列恐有未安因擢崇

簡爲禮

部尚書

錢澄之序公詩文純任性情世皆仰其道隆子

獨窺其情至合讀全集益知公之所以爲情卽

其所以

爲道也

周之道序公早遇寇變時懷幽憂之

感其詩多流連沈鬱具才學識之長

茶餘客語王文貞嘗建言帝王廟祀宜及守成

令主因列商中宗以下七人又言宋臣潘美張

俊宜罷祀詔從之公爲禮部尚書年六十三

以老乞休年七十依古人以每歲讀盡五經爲

夏課嘗作青箱堂記云階前闢露臺方丈餘夏

秋日暮父子兄弟六七人率坐臺上或述祖德

旁及故舊家世之興衰以爲勸戒公出身寒素

父子同時官九卿享上壽乞休於

方渥之時視其子爲宰相倘作林下者十有五

年一生端謹無可指摘可謂極人爵之榮者也

藍瑛圖繪寶鑒續纂敬哉大宗伯晚年游情翰墨盡山水追蹤米南宮命筆立意不落窠臼眞

右丞逸

致衣鉢

紅豆樹館詩話朱荔裳安雅堂集有寄王詹尹五律二首云不見王詹事相思隔禁林傳經家學逸求劍主恩深萬里驅車地三年避弋心瑤華如可寄一和隴頭吟自作秦亭客邊鴻幾度飛有書常隱姓無夢不沾衣憶在碧雲寺飽看紅葉歸此游何日再翹首向王畿案文貞與荔裳先生交最篤緣九青司空公之舊好乙酉避亂丹陽又主荔裳諸兄名瑤者家後旋都門皆朱君瑤所資給故耳

贈陸鞠隱翼王

陸子端雅人妙心何靜朗邁跡淩風塵托物寄幽賞吳
嘯初識面萍水慰傾仰艱難一別後此事已成往歲月

方悠悠出處各潸沆

在昔膠上遊飄泊若浮梗錢黃與王子顧我心耿耿黃
曰攜家來相與息形影非徒喜避地得友可警省君曰
此吾師意氣如日炳旣聞黃陶菴千古在俄頃與君話
疇昔淚灑西風冷

吾旣慚用拙多君素嶙峋倏然來京華慘澹向時人相
逢如夢寐酌酒相苦辛爛漫經術業沈靜語默真獨歌
繼騷雅無累清心神時抱籬下興惟菊爲相親

癸丑四月八日兒熙治具約朱眉山俞彙嘉許元

方周光福趙澹園表弟張涵初壻張左人孫喬

瞻孫堦章元伯四弟毅菴兒慙然照燕默姪燾
孫克善姪孫克忠飲芍藥圃放歌

豐臺芍藥競芳晨一雨鎮日愁殺人朝來恰喜當初霽
妍光艷影別樣新移樽隔夜相招呼弟兄子孫偕至親
更有朋輩多逸興揚鞭偏不顧泥濘眉山老人坦懷多
棄嘉俞子復超勝樸檉真率周與許澹園公子何凝定
好花旨酒值良友左勸右酬杯在手試看前日圃間花
今日好者是前否眼中百事率如此誰是千秋真不朽
遂初堂翫芳亭廉公萬柳昔青青數百年來跡湮滅空
餘白日照烟汀獨有黃鸝聲似舊共君好向醉中聽

送沈仲連南遊

憶昔聯鑣日今餘四十年老來何又別欲去說從前酒
散燕山月鴻迷江渚烟惟期歸棹早笑讀遠遊篇

送俞彙嘉揚州別駕

多君能尙志卓犖負英姿老友期同學愚兒解說詩晴
窗花影下雪夜漏聲遲分袂難堪處相看淚各垂

元宵

元夕風光好開樽玩歲華檐楹懸璧月几席落銀花鼓
打喧童稚燈來出內家宵深難得寐梅影半窗斜

秋夕

滅燭憐虛白開簾待月明疎籬三徑晚幽砌一蛩鳴往
事隨年積秋懷入夜生最宜岑寂裏枯坐學忘情

月宿來青軒

來青軒上宿此夕獨淒清落葉分泉響空山媚月明深
林疏磬歇斗楚遠烟橫倚檻不成寐荒寒入四更

香山深秋

青碧蒼茫裏高巖落磬音門開黃葉亂逕轉白雲深古
殿留殘照幽花媚僻岑泠泠泉咽石秋色滿疎林

歲暮雜興

歲序忽驚晚開樽豈厭頻漫思身外事且對眼前人錦

懸宜銀甲梅花倩繡茵歲華休浪擲欲睡復逡巡

夜坐聞箏

靜夜傳幽響纖微去住音因風來曲牖隨月越疎林塞北淒涼調閨中宛轉心平生無限意入耳恨何深

喜錢飲光至

栖栖寒鳥下庭枝老境偏興良友思常憶兵戈驚散去每逢故舊問歸期一朝來我荒齋坐爲簡懷君昔日詩濁酒淹留聊盡醉陶然且莫說當時

陳緯雲俞彙嘉青箱堂讌集

莫笑年衰逸興稀嘉賓折柬集荆扉草堂談讌無拘忌

麟閣勲名有是非把酒幾回懷往事翦燈相與坐春暉
杏花時節西山好應爲諸公掃石磯

山遊道經灰厰甲申初夏避寇過此

盧溝西去漸無塵曲折坡陀下上頻古岫尙然懸碧落
荒村依舊倚嶙峋難言今日重經路不是當年痛哭人
垂老未衰登頓興此生合與白雲親

戒壇憶天啟乙丑秋金卿非子司直偕遊

昔曾偕友到禪關五十年來彈指間卻幸重遊存白髮
相看不老是青山巖松未改虬螭舞秋葉仍如錦繡斑
誰葺荒壇增氣象朝霞夕月倍幽閒

送顧見山水部分巡姚岷

岷山西望莽蒼蒼
持節仙郎意氣揚
獵鼓風前馳白羽
羌歌燈下出紅妝
氍毹月冷啼烏曉
刁斗霜寒斷雁行
壯志自凌荒服外
摩空嶺上勒新章

贈劉魯一少司馬

帝里論交盡宦途
如君自與世情殊
籌時獨檢天人策
娛客常披海嶽圖
半榻疎陰依亂竹
一簾清影蔭高梧
素懷卻遠風塵外
閒釀松花滿玉壺

豐臺花圃

莫歎春歸倍可憐
風臯雨陌倍悠然
閒庭鳥語人過少

灌木雲來地自偏，曲折引泉穿草屋。
殷勤插圃護花田，當年萬柳園何處。
日落平蕪盡暮烟。

暮秋過摩訶菴園林

幽尋最好是僧廬，卻喜偷閒半日餘。
喬木疎籬皆舊識，滿園烟雨冷秋蔬。

初冬夜夢中作

疎林殘葉怯寒風，僻院迴廊曲徑通。
人靜閒階鶴夢穩，小窗深處一燈紅。

夜飲憶五弟

酌酒依然歡笑多，篆烟霜月奈情何。
筇人不解傷懷處，

猶唱當年變調歌

秋夕

疎荷香繞綠窗低
簾捲秋光日又西
向曉幽林微雨歇
亂蛩四壁盡情啼

對月

清宵坐對月華明
河漢初斜斗欲橫
半掩畫屏銀燭冷
疎林葉葉起秋聲

戴明說

明說字道默號巖壑晚號定圃滄州人明進士

國朝歷官戶部尙書有定圃詩集

天津府志明說初官太僕寺卿丁艱歸盡屏聲
色閉戶治心力究大易閑邪存誠之旨與黃岡
曹本榮檢討時相印證又延容城孫徵君於家
授傳習錄身體實踐務爲有體有用之學其共
切劘者有明經陳奉勅諸生趙時泰一時如王
廷璉李玉鼎王滋孫晏巽等從講焉遠近稱曰
定圖

先生

吳偉業序公工文章善書畫爲詩深渾奇峭超
邁絕倫公餘品藻人士長編短幅淋漓墨海殘
膏賸馥沾丐海內風
流文采掩映一時

百家詩鈔嚴聲詩淵乎其神蔚乎其采公餘殫
心風雅與王覺斯吳駿公范箕生齊名兼善書
畫特受世廟知賜銀圖章勒米芾畫禪
烟澹如靚明說克傳圖章用錫著有廣歷代詩
選唐詩類苑選箋書正禮記提綱廣註等
書晚年有定圖近集鄒鹿合編偶見錄
紅豆樹館詩話尙書畫竹最工筆筆如金錯刀
今之王舍人夏太常也吳蓮洋雲嘗題云湖州

太守貧方善協律郎官老更工惟有尙書最
尊寵閒中寫出葛陂龍其推服蓋甚至云

謫豫州別高中孚太宰

風雪驅孤客單車出上林於君誰苦口如我亦甘心河
洛徵求急江湖戰氣深憂思懸寤寐星迸夜沈沈

題王西樵年丈小像

鹿砦今將老能封草徑無嶽搖驚句健月定愛禪枯爾
我千秋外曹劉一代孤平山遺落照莫誤洗桐圖

送張虎別中翰

半樵鐵樹香山裏一釣晴雲滄水西短劍荒村哀鼠盜
孤舟涼雨病荆妻鬢綠心拙三江老天許文窮五嶽樓

爲擬歸來秋滿帳元經緣綺正堪攜

題顧夫人蘭卷

孤根耿耿護陽春許伴三閭問夙因
鬢鬢鷗波亭子上
湘烟清照管夫人

倪光薦

光薦字相如天津人明進士國朝官太僕寺

卿

高恒懋序余總角時聞先文端稱先生詩古文
詞皆自出機軸與古人相上下余寄居津門先
生以先文端故推好於余因得讀先生詩文
沈雄博大爲唐宋而不爲六朝詩高華典貴爲
北地而不爲竟陵以觀皆自出機軸上
下古人之言先文端共其知先生者哉

西山臥佛寺聽古松聲歌

濃雨夜過朝烟涼花氣引人來禪廊
入身忽聞波濤在仰見虬龍參空翔
高支盤作春雲黃低枝拂地清陰長
橫斜都有千尺強鱗皮脫落腹飽霜
半死未死骨不殭千百餘年閱滄桑
不知身歷幾興亡青枝黛色猶蒼蒼
亭午不落朱曦光中有天風吹海洋
上有仙人騎鳳凰月明皎皎停霓裳
逕爲細細吟笙簧又疑玉佩鳴琮璜
寺僧夜半行即當驚鐘鼓開佛場
神遊上古溯鴻荒何人種此形昂藏
留作濟人大慈航慎勿遭厄值吳剛

王公弼

公弼字直卿號梅和滄州人明進士 國朝歷

官戶部侍郎祀鄉賢有景慶堂詩選

畿輔通志公弼官戶部出納公慎自矢性至孝
痛母苦節一言一動必稟命而後行鄉黨稱之
朗吟樓呂仙祠

丹梯插碧枕河流可是仙人居好樓雲住乍疑蓬島近
月明還憶楚江秋洞庭西放雙鳧去滄海今隨一劍遊
夜盡波澄聽唳鶴醉驚珠斗豁吟眸

劉餘祐

餘祐字五孺宛平人明進士 國朝官戶部尚

書有燕香齋集八卷

四庫全書提要燕香齋文集四卷詩集四卷劉
餘祐撰其自稱濱苑者先世濱州人也是集爲
其子方詰所編每篇之末皆有評語如坊刻之
式後附餘祐行畧猶前人所有之例至附以其
妻之行畧其父母之
墓志則非古法矣

辛卯清明過先壠有感

時事如蒼狗長空過白雲誰能免淺土人尙競深文隔
歲春風面新烟曠野墳只應裁百感都付一杯醺

孫昌齡

昌齡字二如一字念劬號元嶽寧晉人明進士
國朝官都察院副都御史卒贈都御史諡恭
憲有亦園集四十卷

廬墓行

任英給事涇陽父死於兵英謝涇陽匍歸廬墓側

有父生離兒遠行乾坤轉眼滿甲兵我父歆又我不見
生我者死我乃生歆又父應仍我顧我歸省父只見墓
父兮父兮土一抔蒿蔚蕭蕭風滿樹倚廬墓側心傷悲
父死廬墓亦奚爲泣語世間遠遊子有父勿爲廬墓兒

王正志

正志字逢源靜海人明進士 國朝官延綏巡

撫

畿輔通志正志順治初以都御史巡撫延綏軍政修明邊境又安姜瓖叛正志檄諸將固守參將王永福開門延賊正志死贈左都御史廢一子

燕山雜詠

病起愁容減長貧不問錢看花紅滿袖
芟草綠生烟拭劍杯前壯翻書倦後眠自憐成懶癖未許受人憐

李起龍

起龍字霖蒼號景純南宮人明進士國朝官

陝西按察使

南宮縣志起龍授行人壬午典試雲南所取多知名士甲申值闖寇之變傳大衍因問欲走哭臨爲賊所執誘之降不屈國朝定鼎詔作京臣民哭臨大行起龍易衰絰痛哭因中風卒

抱病旋里吏垣巡按交薦仍補行人歷禮部郎
中陝西大同道右參議兼僉事陞兆岷道副使
值回變後人心惶懼起龍撫綏軍民駕馭番族
遠定安集悉有次第兆岷不知學觀風考課獎
勵激勸文風漸起創立岷山驛遮岷州營房留
心訟獄力持公道遠近頌爲神明甲午陞陝西
督糧道嚴禁包納愼簡倉官逐版盤查繕造清
冊任事一載獎絕風清乙未陞陝西按察使一
年中間結百餘案致仕歸

宿彌陀寺

黃昏古寺噪啼鴉一夜無眠憶故家骨肉半隨青冢恨
詩書空逐碧雲賒宦情雞肋徒羈客世路羊腸易覆車
此味到頭看得破不如勇退臥烟霞

趙端

喘高邑人明進士 國朝歷官浙江巡按

歲在己篇

嗟嗟歲在己 鬻妻復賣子 誰者爲斯譖 今年驗若此 昨
秋種來牟 所望糗糧峙 徂冬及三春 雨雪不濡軌 青郊
埋黃塵 入夏更如燬 收刈不償種 八口何所恃 是時余
抱疴憂來更難已 中夜不能眠 徬徨三四起 但見雪漠
明 杳無河渡豕 祈禱術亦窮 化離從此始 六月二之日
黑雲遮日晷 俄頃翠峯生 太虛行瀾瀾 震雷走旱魃 驕
陽化成水 皇天怒有恩 蒼生懼而喜 典衣糴穀種 傾囊
力耘耔 可以作酒醴 亦既有黑秬 可以濟孔饑 亦既有

白芑回視二麥時吾苗良薨薨七月初旬間大雨水不止南北兩河漲白浪將入市夜聞鐘鼓喧滿城俱登壘掘土塞四門封穴如螻蟻平旦水勢退千家垣屋圯我農哭動野百畝成泥滓始願觀穎粟今並無糠粃上天巧困人誰能測伏倚幸有仁撫軍視民如視己州縣請民命一一爲疏理蠲賦有重輕朝上暮得

旨邑

君方治病不遑造民祉豈無鄭俠圖終忘置高懸況復民愚樸忍死閉口齒閭閻匪難叫又疑蹈謗毀所以鳩鵠人邀恩異鄉里汝邑旣無災征輸則宜爾哀哀皮骨盡予遺長已矣誰無惻隱心宛轉視其死手乏援溺具

徒深納溝耻吾欲重呼天藐藐高其耳

按高邑縣誌康熙四年乙巳春

夏不雨
秋大水

董國祥

國祥字福口隆平人明進士 國朝官吏部侍

郎有了餘園吟草

擬古

青鳥夕棲林孤雲有還期蕩子客燕薊三年猶未歸邊
馬嘶月黃秋風摧鬢顏閨中砧杵急塞北衣裳難踟躕
思寄衣遠道知何處裁成心自傷脉脉不得語生爲蕩
子婦不及一王睢悵望北山雲顚顚徒自知

李廣故飛將百戰不得侯可知運數奇不如守舊邱
翻五陵兒意氣大長秋白玉煮羹湯黃金飾馬頭乘時
各有人勿用悲沈浮君看灞橋月不照漢時舟黃河一
千年日夕東海流春來桃花水爲覓避秦儔彭聃今亦
無何事空百憂

江南曲

蓮塘十里花如霧楊柳春風迷曉幕邊沙吹鐵日光寒
笳聲嗚咽交河路旃罽爲衣酪爲漿琵琶哀怨動人腸
恰看燕子銜春至舊壘新巢復自忙歌江南夢江北思
不見長太息蕩漿蓮塘難再得

元日喬文衣過訪用文衣韻

應有憐狂癖，翛然到遠扉。
虛堂長日靜，生事逐年微。
酌酒看雲落，開簾見鳥飛。
西山一片月，佇上薜蘿衣。

喜得趙問源抵里消息

知君雅意弔蒼梧，攬轡忽忽未定居。
握手西瞻函谷月，齎心南憶武昌魚。
詩題黃鶴羞前輩，瓜種青門羨後車。
身世浮雲俱不著，洞中小有舊藏書。

趙漁

漁字問源，唐山人，明進士，國朝官陝西布政

使。

偶閱秋圃督家僕捃理蔬蟲

家貧值水荒冬春資秋菜空場耕爲圃蔬生兩自慨
土蒔苗已稀露雨滋蕪蕪晨起閒過處垂地秋雲輟
驚破葉葉諸蟲在青者曲如蛇黑者點如黛掃除莖
欲損撲打根恐礙蒼頭施法老密羅盡一槩一笑抒
余恨又嗟傷吾愛萬物皆並育口腹不相貸蟲當慎
爾貪我亦學吾耐

金鎮

鎮字又鑣號長真宛平人明舉人國朝歷官

江南按察使有清美堂詩集

毛奇齡金君墓志君少有夙悟崇禎壬午領解
順治改元授山東兗州府曹縣知縣旋覲歸補
河南陝州閩鄉縣知縣改鑾儀衛經歷隨陞刑
部河南司員外郎康熙十三年進本部郎中會
縣以君使河南恤刑自本年十月至十四年四
月凡七閱月計所全活約一百一十人矜疑半
之援赦又半之次年轉河南汝寧府知府時淮
蔡多盜兼無年民田荆榛道殣千餘里前代真
陽西平諸遺孽根株未清往來荏苒間而新蔡
李樊與泌陽郭三海據平頭寨相結以起民爭
逃村落皆墟君一意撫字除苛細下墾土之令
生聚教訓示民以自新取爲政去太甚一語書
之訟堂而親統銳丁勦李樊除其根株一切勿
引蔓會清理藩產躬驗丈尺而海上投誠兵適
安插真光之間凡開屯升稅極意調劑令民兵
相安至于興利除弊及一切津梁祠宇宜緩宜
復者皆受整理君治汝十六年改補揚州知府
值撤藩兵變長江上下風鶴相驚而維揚適當
其衝城中震恐一日三徙有爭門而奔者君力

爲慰諭且以威恠之始安然而兵馬驛騷君處
以鎮靜嘗招名士遊燕修復平山堂作文誦之
乃事治民得不擾陞江寧驛傳鹽法道副使兼
署鹽運司事陞江南按察使大計人觀召對
令敷陳時事時所對有二其一請定盜案嚴減
之例謂江左連年留盜賊多有三載之中題報
入十餘而其中飢寒逼迫可減者衆如一時窮
困被誘竝不傷事主或得財求依分或干事主
家雜取棍械護身原未嘗攜帶器械仗皆宜救部
分別量減永定爲例至捕役營兵衆縱勒財以
致先取贖物然後報官甚有指稱打點代行錢
令行劫償還是盜有時盡而捕盜之盜反無窮
也如此得實宜從窩盜律一體重擬則犯盜者
少而民得安矣其一請定旗下一體重擬則犯盜者
訊之例謂江寧京口二旗買人多有無籍者自
立賣契旂主但送上元江寧丹徒三縣用印而
竝未行文原籍察其真僞多有展轉掠買而不
之知者嗣後請三縣用印官將所買之人申報
巡撫巡撫按季報部隨卽行文原籍出示招驗
其有可疑者令旂主還契追價其用印官不報

照新例治罪至于旂下逃人奉有承審官夾訊
之例獨旂人爲盜被獲難以刑訊其狡賴展脫
將何底極嗣後旂人爲盜倘夥證甚明贓杖已
確許承審官徑行刑訊則奸宄畏法而盜風息
矣疏
間稱
旨又明年康熙乙丑卒

北上別汝南州縣

明發遄言邁班馬何駢駢年深愧匏繫回首念艱辛荒
殘十四城撫循賴同人流移亦已歸桑麻易荆榛絃歌
徧衢巷致此良有因集裘匪一腋同舟匪一身藉手追
厥戾離筵情倍親行行去帝鄉溫言慰吾民各有慈母
存羣公皆至仁尙勉甘棠化汝墳跡未湮鴻鵠志千里
奮翮凌青冥斜日重流連西郊起行塵惆悵黃鳥啼薰

風吹征輪

發汝南留別諸生

僕夫早嚴駕捧檄遊京畿既共父老別行與諸生辭麗
日照南湖清芬散江離多謝彼都子褰裳擁路歧與賢
余夙心惠風殊未施天中讀書臺回首雲樹迷何以志
永懷眷言贈將離人生三不朽崢嶸須及時汝南多先
賢世遠道足師夕陽下西山班馬何依依且盡盈尊酒
千古以爲期

過信陵君奪晉鄙軍處

人臣無專擅所以明至尊胡爲魏公子竊符應平原讀

史起疑猜常欲吐一言秦圍趙乞師趙存六國存公子
有早見設計解軍屯事蹟則已僭內心猶可捫戰國主
合從信陵爲發源會上魏王書勸與六國援指斥虎狼
秦鳴咽輒聲吞古人逝水駛戰壘春草蕃智勇冠當代
三軍安足論昨從大梁來惆悵城東門

湯陰使院中松石絕佳率爾題壁

每遇山水佳流連不能已松間數拳石嵌空幻奇詭上
有百尺陰虬幹互攀倚我來值炎序解帶涼颼裏苔壁
剔題句前賢信清美緬想寇氛急滄桑幾城市獨此巋
然存神物敢褻視俯仰生遠懷揮杯竟餘咎故山有松

泉直欲褰裳起

冬夜夢先大人

慈竹能護根飛鳥知報本遊宦在四方歲月忽荏苒年
力日以邁風木悲已晚清明望邱墓千里淚徒泫虛捧
毛義檄忍踐王陽阪中宵見吾父庭訓儼勗勉亶亶無
別詞祇是強爲善廉吏自可爲有終弗宜鮮愛子兩三
人參差各天遠似慙道路長惆悵意不展涕泣起牽衣
音容猶在眼誰知邈難卽一去不復返陰雲竟黯淡暗
月尙隱顯爲語承歡者事親苦日短

悼亡妹

妹字李氏十九出閣二十一而寡三十有六卒
於汝寧官舍時庚子六月二十二日也詩以哭
之

離離女貞樹皎皎明月珠十三工織綺十五嫺詩書十
九詠桃夭彌歲所天徂引義矢明信心若沈灰枯夜火
守機杼朝餐甘荼熒熒踰十載抱影坐空廬子女無
一出守貞詎踟躕還家失怙恃晚與兄嫂居少弟願迎
姊遠宦天一隅汝南猶近畿官舍相依扶伯兄時繼至
晨昏集友于雖無多厚養聊足慰羈孤本圖相與存詎
意不克俱孟夏汝負病半月顏色痛兩月汝畢命力盡

空歛獻伯兄方入燕胡不待斯須通知嶺海外崩慟溼
衣襦余生信薄祐風木悲有餘兄妹四五人行復半凋
疎沈哀結心脾回首憶京都小妹嫁胡郎昨歲亦已無
連枝菱佳木並蒂摧芙蓉吁嗟我父母靈爽今何如妹
喪難還歸湖寺停靈輿哀鴻叫虛館陰風振寒蕪沒有
千種悲生無一日娛兄弟限各方念惻同根株

題京口魯子猶畫

弱冠耽翰墨清鑒愧名理畫苑自林立往往蹈俗軌魯
君妙揮運含毫有深旨胎我尺素箋咄哉佳山水烟深
樹轉明嶺斷雲欲起氣韻旣超逸風骨逸難擬臨池君

擅場縱橫任驅使再詠瑤華什三絕信爾爾嚴阿正睇
髮江渚方洗耳丹青祇一斑詎足盡君子欲濟川無梁
攀芳徒徙倚

重立天中書院

漢世重守吏養民無所先氓俗苟未和所急非簡編顧
念淳風邈教養理必兼嗟予夙寡陋期月慚化宣荒疇
漸已闕禮義猶闕焉繼軌振斯文舊館無尺椽汝南多
君子表表六孝廉衡門棲黃憲大雪臥袁安忝荷王龔
職深慕漆雕賢如何兵燹後詩書殊蕩然庠序雖猶存
絃誦恐不專暇豫揖諸生廢解可授屢商歌寧苦饑饉

粥有薄田德業於此進庶無耳目遷佳木生崇岡明珠
出深淵朝華與夕秀文采將可觀仰企棧機風聊用塞
素餐

渡黃河再至汴梁與舍弟治公別

十載埧簾久濶別今年晤對殊親切何意驅車燕市還
重話離愁更嗚咽憶昨黃河風浪高蛟龍噴起千層雪
隱隱長嶽見樓臺依依汴水明旌節愛是官樓姜被溫
還虞歧路驪歌徹果然東門衰草天一卮酒盡肝腸絕
從此分符向廣陵回首繁臺樹明滅人生骨肉最歡娛
一官南北寄羈縻何似連牀對雨眠鵲原情事殷勤說

正陽關卽事

幾派中原水奔流下潁河連年比戶集隔岸估船多日
落爭先渡風微欲放歌驚心壁壘在往代此橫戈

壽春道中

詞賦淮南盡勛猷淝水虛空留名勝蹟曾是戰爭餘秣
馬當官道關弓過廢墟青山如笑我偏不狎樵漁

過清流關

歷盡岡巒峻巖關吐白雲一行穿暮色萬里見斜曛地
擁金陵卅山疑鐵馬聞重而今不閉知已靖邊氛

懷胡又申妹夫

荀郎三載別契濶此情真輦下頻相憶天涯幾至親烏
啼鴛夢斷花落鏡臺春且獻長楊賦非徒慰達人

鄱城奉謁魏相國留飲葆石堂賦謝

玉燭調成一疏歸東山絲竹遂初衣青門容我投元禮
黃閣惟公薦陸機便許觀碁開別墅還同把酒對漁磯
此行躑躅千秋陌吐握于今魏相稀

次定州寄何石公內兄

時石公爲完縣尉欲爲
政友閭立凡謀歸櫬

鼎湖舊好惟君在一尉蹉跎鬢漸斑千百里程空寄札
十三年別未開顏已慚長者存心厚欲護貧交旅櫬還
此日郵亭聊駐馬可能來話綠楊間

渡江至京口作

伐鼓臨江放櫂行，江雲黯黯欲相迎。
樓臺樹壓山平出，蘆荻風迴潮漸生。
落日西津同作客，新年北府又增兵。
匡時無計聊舒嘯，鷺鷥全能減宦情。

登虎邱

金閭亭下買輕舟，小泊山塘問虎邱。
一自闔閭埋霸氣，到今短簿擅風流。
日斜泉響沈歌板，雨罷松聲散酒籌。
獨向生公求妙偈，石亭鐘磬冷如秋。

從仙裳得田雪龕書問

中原攬勝採芳蓀，室邇人遐結夢魂。
交重江南貧刺史，

名高粱苑老夷門新詩喜挹瓊枝秀客路晴開海霧昏
蘿薜久荒徐孺宅幾時迴馬到沙村

邢州道中經圓津菴

小憩茅龕啜紫茶雨收十里度平沙香臺初日門扉靜
一院紅舒夜合花

都門題友人停帆館

紙閣蘆簾碧樹邊清江何用伴鷗眠百年應悟虛舟諳
不似張融岸上船

紅橋

柳岸長橋覆酒家采蓮歌起日初斜轉思十載天中路

風雨南湖發藕花

坐韓閨西小齋看搆藥欄

移石芟荆督掃除幽人興致自蕭疎春來雨過花新綻
傍檻鉤簾好讀書

趙永吉

永吉曲周人明舉人國朝官浙江石門縣知

縣

重九夜坐

雨霽疎星淡風微畫角長筆牀清印月茶甌冷含霜送
酒時何暮羣芳晚自香笙蕭休漫倚鳴雁過寒塘

王蔚

蔚字昌之號文徵邢臺人明舉人國朝官知縣有韋菴集

旅長沙

白日聽鳴笳江流雉堞斜有天皆帶水無夢不歸家人散空城雀魂開古戍花當年猶痛哭翻恨賈長沙

楊啟辰

啟辰字元蓋磁州人明武舉國朝以平海寇功封懷遠將軍加副將銜

清泉寺

古寺銜山腹清泉繞鑑塘殿虛雲氣入巖靜草花香野
叟觀仙奕村僧說漢王凭欄山下望一線是清漳

胡鳳閣

鳳閣字君榮永年人明貢生 國朝歷官安徽

廬州府知府有伏櫪齋集

永年縣志君榮崇禎中爲濟寧州知州順治中
任濮州知州陞鄆陽同知丁艱歸再補開封同
知撫荒殘除盜賊戢叛兵陞廬州府知府治
尚寬簡廬人愛之以自奉薄稱長齋太守

荷花館

暫逐仙槎入水雲尊開涼閣占幽芬烟凝曲檻風香合
月下孤城夜色分爲愛波清催洗盞還憐調合許論文

芳洲是處堪移席燈火防驚鷗鷺羣

梁維樞

維樞字慎可正定人明舉人 國朝歷官湖北

武德兵備道祀鄉賢

四庫全書提要玉劍尊聞十卷梁維樞撰是集
作于國朝順治甲午取有明一代軼事依劉
慶義世說新語門目分三十四類而自爲之註
文格亦全仿之然隨意鈔撮頗乏持擇如李贄
嘗云宇宙內有五大部文章漢有司馬子長史
記唐有杜子美集宋有蘇子瞻集元有施耐菴
水滸傳明有李獻吉集之類皆狂謬之詞學晉
人放誕而失之者其註尤多膚淺如曹操李白
之類人人習見何必多累簡牘乎至所以名書
之義吳俾業諸人之序及維樞自作小引均未
之言今亦莫得而詳焉

幾輔通志維樞正定人明兵部尚書夢龍之孫
萬歷舉人受業趙忠毅南星之門忠毅常曰風
雅不墜復見之梁生矣復從楊忠烈漣游會逆
奄起詔獄趙首被禍維樞傾身翼之楊鉅鎔道
出正定維樞往迓之大言檻車之旁曰公此行
足以垂名竹帛公之本志豈足畏哉于時邏卒
獠立人謂不爲門戶計維樞灑然不顧也尋授
中書舍人入本朝爲工部郎擢武德兵備武
德多鳴憊暴客難以勦治維樞練營卒飭法令
境內肅然絕苞苴恤徭役惠政流聞乞養歸著
有玉劍尊聞姓譜日牋內閣小識
見君子日牋等集數百卷行世

送魏環極給諫歸養

錫類逢

英辟

恩俞省侍行養親須令子

名世尙清卿忠孝傳家譜文章狎主盟追鋒何日駕輿
望有餘情

范士楫

士楫字箕生定興人明進士 國朝官戶部郎

中有橘洲詩集六卷

四庫全書提要橘洲詩集六卷范士楫撰是集皆其順治乙酉以後之作其詩尙染明季偽體

卷首自序一篇故爲

奧繼亦當時習氣也

紅豆樹館詩話箕生崇禎丁丑成進士官陽曲

洪洞兩縣令入 國朝爲選司郎中申明銓法

以不阿忤權要告歸其父文源明繕司郎曾輯

范陽志畧一書未竟箕生致仕後踵而成之雖

文筆詰屈而網羅散佚

亦足備一邑文獻也

卽事述懷三十韻

車馬蕭然一草菴故人傳語借丁男別來歲月儂常數

近此風光君豈諳客臘雪蹢工販絮今秋雨飽劇收藍
不時細柳編雙鯉尙有殘桑熟八蠶老子婆娑催釀菊
諸孫刺促競分甘野人舊望山中屐之子新拌冠上簪
百年雞黍倉皇具萬里縱橫率意談顧我蓬科腸自轉
未應石闕口嘗含明知客路猿愁險爭怕單行虎視眈
兩處種榆皆指北半生取義載司南身夷白帟曾無叱
彫照清溪定不慙多難年籌加社櫟讓榮天性侶山楠
翩翩那憶王陽綬落落偏傷石父驂底事避人深竹徑
幾回臥病典書僦藥收水族吹星鯽味減吳姬背瓦蚶
累在空知嶽有五僕凋漸欲馬成三因聽燕語聞箏甲

卻爲龍鳴惱劍鐔蘋藻代金存季札芙蓉留粉誰何截
忌醒叵耐田荒秫習淡剛宜水秀蕘乍可爲農爭上次
焉能與賈論廉貪閒將警枕蛛從網斷得宸樽蟻鬪酣
下里歌鐘騰短鉅遙天涕淚墮長鏐孤筇有客悲游埭
五字何人議負擔尙怪玉環搖宋鵲不驚金屋到袁慙
鳴瓊泛驛隨時作刻燭披緗到老耽計少精芒役雷部
乃羞憔悴浣江潭勁松先隴知難問亂竹荒城耐可探
一夕朔風翔代馬千秋白日在燕函浮家旋卜餘衰鬢
情話由來帶曉嵐蒼髯試教添牧笛黃鸝誰更佐雙柑

秋日雜興

薄宦京華鬢漸斑不須看鏡問雙鬟縱無容膝柴桑地
肯與淮南競小山

李士焜

士焜字又白任邱人明進士 國朝歷官工部

左侍郎有麟篆齋集

任邱縣志士焜授河津令闖寇逼垣墜不足守
焜區畫濬築旬日完固巡撫吳公移軍駐境內
糧食芻蕘供億無缺吳奇而薦之詔內擢適父
墳宇刑邑難奔喪歸灑血乞卹奉旨建祠服闋
擢工科給事中督漕中州歲大饑人相食焜奏
狀詔捐賑有差壬午遷刑科給事中以方介忤
權要出爲河東道副使巡河干見浮舟百艘營
將請擊焜曰此難民非亂民也促招附岸共干
六百有奇咸感再生甲申闖寇行傷脚於平陽
焜碎之杖段其使聞京師陷棄官寓 國朝起

用爲兵科左給事中累晉工

部左侍郎著有刑垣疏草

王崇簡李公墓志公幼而端穎資性純茂官浙江布政使禁旅駐寧波時芻餉以資飽騰而民若無事行已澁官屹然爲世矩範

抵家

屈指離家四十年遙瞻城郭轉淒然菊松深訝歸來晚
鬢有秋霜鏡亦憐

李芳莎

芳莎字臺辰永年人明貢生 國朝歷官廣西

柳州府同知有威如堂詩集

歲輔通志臺辰以拔貢知武鄉有惠政遷柳州同知未赴乞歸性質實好讀書寢食於經史百

家爲文淵停無涯際詩
格沈雄得少陵氣骨

宋舉筠廊偶筆順治三年七月二日

上

出大內歷代珍藏書畫

賜廷臣先文康

公以大學士蒙

賜臨沼李臺辰侍先文

康夜飲先公以謝表相委李揮毫座上如風雨

脫葉時纔二鼓耳一
時輦下侈爲美談

泉亭寺雜詩

趺坐翻成懶持齋豈爲貧荒村粗有屋瘠土不留人避
餌知魚巧穿窗喜燕馴池清如鏡裏愁與照風塵

新泉三尺淺小市一彎通荷動珠難定魚來水漸紅幽
花香挹露熟果落隨風社鼓雲中響兒童祝歲豐

雜卉初無譜方言強命名風林依鳥宿山水逐門平日

烈瓜先實亭深草易生前途歸馬熟自覺去來輕

邊大綬

大綬字素一號長白任邳人明孝廉國朝官

至山西太原府知府

任邳縣志大綬崇禎己卯孝廉授陝西米脂縣知縣米脂乃闖賊李自成故里時闖逆猖獗流毒海內綬下車偵知其先墓伐之迨賊破神京移明祚綬全家被執幾死者再國朝起用補河南修武縣知縣勸農興學著有勞績陞山東青州府海防同知青州瀕海賊出沒無時綬捕禦有法賊不敢犯全屬賴之以安擢山西太原府知府莅政三年執法嚴明民懷吏畏以病告休著有虎口餘生錄行世

程正揆餘生錄序甲午見太原守邊長白先生所刻餘生錄噫先生之智奇之功大矣夫賊以

亡命罪至通天糜我疆土逼我君后竭四方之
師武臣力不能一矢相遺海水羣飛白日晝晦
先生獨能出奇計殲逆之惡制死賊之命王
癸天下唯長白一人而已向使長白重身家計
利害或知而不爲爲之未必有濟將若之何雖
然皆天也非人也闔不生下不亂闔不死天
下不平長白不令米脂闔脉不絕鬼神不助長
白國仇不復然則洩先明十四帝之憤開我
朝億萬年之運者亦

惟長白一人而已

紅豆樹館詩話虎口餘生錄傳本不一率多援
據失實附會神怪乾隆中公裔孫名思訥者官
山西夏縣知縣始重加校刊勒爲定本案公伐
闖賊祖墓事附載明史汪喬年傳中稱靜海人
而小倉山房集謂爲順天人籍貫微有不同其
他著作亦不多見過方山七律一首采自縣志
清絕無
塵腐氣

過方山

三十年來歲月虛偶因烽火過禪廬白雲不斷人行路
消受松風一夜餘

國朝畿輔詩傳

卷七

天

國朝畿輔詩傳卷七終